



廿二史言行畧


九下

九



內閣文庫		
番號	漢	9028
冊數	42	( 9 )
函號	290	141

共四十二  
史鈔九



淺草文庫

沈正父為屯田院衙官凶暴無賴使酒毆平人死正中塗見父  
恐懼述其故正即號呼褫衣就毆其屍巡警者捕送官獄具

怡然就死聞者悲之



宋史邢  
神雷傳

申世寧紹興六年潘達兵襲鉛山父愈年七十未及出戶遇賊  
賊意其有藏金欲殺之世寧年未冠亟引頸願代父死賊感

其孝兩全之

宋史申  
世寧傳

蔡定家世微且貧父革依郡獄吏傭書以生資定使學遊鄉校  
稍稍有稱郡獄吏一日坐舞文法被繫革以誑誤年七十餘  
矣法當免繫鞫胥任澤削其籍年而入之罪且與獄吏等案  
具府奏上之方待命于朝故俱久而革不得獨決定切痛



廿二史言行略 卷九  
念父當者年以非辜墮圖徃誓將身贖數詣府號懇請代坐  
獄弗許請效命于戎行弗許請隸王符爲兵又弗許定知父  
終不可贖也仰而呼曰天平將使定坐視父纏徽纆乎父老  
毫不應連繫備書罪不應與獄吏等理明矣而無所云懇父  
老而刑定之生其何益乎定圖死矣庶有司哀憐而釋父則  
雖死無憾矣於是預爲志銘其墓又爲狀若詣府者結置袂  
間皆敘陳致死之由冀其父之必免也以建炎元年十二月  
甲申自赴河死府帥聞之驚曰眞孝立命出革厚爲定具棺  
斂事而撫周其家

宋史蔡定傳

鮑宗巖子壽孫宋末盜起里中宗巖避地山谷間爲賊所得縛

宗巖樹上將殺之壽孫拜前願代父死宗巖曰吾老矣僅一

子奉先祀豈可殺之吾願自死盜兩釋之

宋史鄭綺傳

陳顏父光調壽陽尉光家奴謀良不可誣告光與賊殺人光繫  
獄榜掠不勝因自誣服顏詣郡請代父死太守徐某哀之不  
敢決適帥臣至郡以其狀白帥曰此眞孝子也遂併釋之

陳顏傳

張禧從征拜行中書省平章政事禧子宏綱父禧爲主將所誣  
繫獄將殺之宏綱直入獄中獄卒併繫之宏綱佯狂謔笑守  
者易之遂與其父逸去

元史張禧傳

王閏父嘗臥疾夜燃長明燈室中火延籬壁間閏聞火聲驚起

事父母門

馳救火已熾煙燄蔽寢戶闔突入火中解衣蒙父抱而出肌體灼爛而父無少傷一女不能救遂焚死

元史王開傳

郭狗狗父寧為欽察先鋒使首領官戍大良平宋將史太尉來攻夜陷大良平寧全家被俘史將殺寧狗狗年五歲告史曰

勿殺我父當殺我史驚問寧曰是兒幾歲耶寧曰五歲史曰五歲兒能為是言吾當全汝家即以騎送寧等往合州道遇

國兵騎驚散寧家俱得還御史以事聞命旌之

元史郭狗狗傳

樊淵奉母避兵茅山兵至欲殺其母淵抱母號哭以身代死兵兩釋之

元史樊淵傳

賴祿孫母病值蔡五九作亂負母避南山盜至祿孫守母不去

盜將刃其母祿孫以身翼蔽曰勿傷吾母寧殺我盜相顧駭歎不忍害有掠其妻去者眾責之曰柰何辱孝子婦使歸之

元史樊淵傳

王初應從父義士樵劉嶺山有虎出叢棘中搏義士傷右肩初應赴救抽鎌刀刺虎鼻殺之義士得生

元史王初應傳

施合德父真祐嘗出耘為虎扼于田合德與從弟發仔持斧前殺虎父得生

元史王初應傳

徐鉦始冠侍父鎮將之婺源過丹陽小谿鎮乘橋失足墮水中同行者立岸上不能救鉦投谿擁鎮出鎮得挽行舟以升鉦力憊且水勢湍急遂溺死屍流四十五里得于灘江浙行省

言狀表異之

元史徐鉉傳

張紹祖讀書力學以孝行聞于朝特授河南路儒學教授至正十五年奉父避兵山間賊至執其父將殺之紹祖泣曰吾父耆德善人不當害請殺我以代父死且若等非父母所生乎何忍害人父也賊怒以戈擊之戈應手挫鈍因感而相謂曰此真孝子不可害乃釋之

元史張紹祖傳

李明德瑞州路上高縣人至正十四年亂兵陷袁州因抄掠上高兵執其父欲殺之明德泣告曰子豈不能代父乎願勿害吾父也兵遂殺明德而免其父後以高壽終

元史李明德傳

張緝轉泰州幕職棄之養親居揚州揚州亂緝母姬氏方臥病

賊突入臥內舉槍欲刺姬緝以身蔽姬槍中緝脇三日而死

元史張緝傳

孫抑歷仕至刑部郎中關保之變挈父母妻子避兵平陽之栢村有亂兵至村剽掠拔白刃嚇抑母求財不得舉刃欲斫之抑亟以身蔽母請代受斫母乃得釋而抑父被虜去不知所之或語之曰汝父被驅而東矣然東軍得所掠民皆殺之汝慎無往就死也抑曰吾可畏死而棄其父乎遂往出入死地

屢瀕危殆卒得父以歸

元史孫抑傳

石永事親至孝值亂兵掠鄉里永父謙孫年八十老不能行永負父匿山谷中亂兵執其父欲殺之永亟前抱父請以身代

兵遂殺永而釋其父 元史石永傳

呂祐至正二十六年郡城破有卒入其室拔白刃脅其母林氏索財寶不得揮刃欲斫母祐急以身蔽母而奪其刃手指盡裂被傷仆地良久而甦開目視母曰母幸無恙我死無憾矣遂瞑目死 元史呂祐傳

殉親

慕容白曜遷征南大將軍使持節都督青齊東徐州諸軍事開府儀同三司青州刺史濟南王見誅白曜少子真安年十一聞父被執將自殺家人止之曰輕重未可知真安曰王位高功重若有小罪終不至此我何忍見父之死遂自縊 魏書慕容白曜

傳

陸閑仕揚州別駕永元末刺史始安王遙光據東府作亂閑以綱佐被收徐世標命殺之閑子絳時隨閑抱頸求代死不獲遂以身蔽刀刃行刑者俱害之 南史陸慧曉傳

江從簡位司徒從事中郎侯景亂為任約所害子兼叩頭流血乞代父命以身蔽刃遂俱見殺 南史江革傳

虞世基位金紫光祿大夫宇文化及弑逆世基見害子熙為符璽郎柔晦竝宣義郎化及將亂之夕宗人虞伋知而告熙曰事勢已然吾將濟卿南度且得免禍同死何益熙曰棄父背君求生何地感尊之懷自此訣矣及難作兄弟競請先死行

刑人先世基殺之

北史虞世基傳

田宏正爲檢校司徒兼中書令鎮州大都督府長史充成德軍節度鎮冀深趙觀察等使軍亂宏正遇害宏正子布長慶元年鎮涇原鎮州軍亂害宏正詔布爲魏博節度使檢校工部尚書乘傳之鎮布喪服居堊室去旌節導從之飾及入魏州居喪御事動皆得禮其祿俸月入百萬一無所取又籍魏中舊產無巨細計錢十餘萬貫皆出之以頒軍士進軍結壘南宮縣南軍無鬪志衆潰布還魏州會諸將復議興師而將卒益倨布度衆終不爲用嘆曰功無成矣即日密表陳軍情且稱遺表奉表號哭拜授其從事李石乃入啟父靈抽刀自刺

曰上以謝君父下以示三軍言訖而絕

舊唐書田宏正傳

沈季詮侍母度江遇暴風母溺死季詮號呼投江中少選持母

臂浮出水上都督謝叔方具禮祭而葬之

新唐書沈季詮傳

王博武侍母至廣州及沙涌口暴風母溺死博武自投于水嶺南節度使盧貞俾吏沉罟獲二屍焉乃葬之表其墓曰孝子

墓詔爲刻石

新唐書王博武傳

劉保勳知幽州行府事子利涉以開封府兵曹督芻粟隨軍常從其父會王師不利濟巨馬河更相蹂躪保勳馬陷淖中利涉自後掀出之力不勝人馬相擠壓遂俱死

宋史劉保勳傳

謝徽明爲當陽尉攝縣事大元兵至徽明出兵戰死二子生進

抱父屍亦死宋史謝枋得傳

李升起進士為吏靖康中金人破汴以刃迫其父升前捍之與

父俱死宋史李芾傳

石明三與母居餘姚山中一日明三自外歸覓母不見見壁穿

而臥內有三虎子知母為虎所害乃盡殺虎子礪巨斧立壁

側伺母虎至斫其腦裂而死復往倚巖石傍執斧伺候斫殺

牡虎明三亦立死不仆張目如生所執斧牢不可拔元史石明三傳

周樂父日成海賊竊據温州拘日成置海舟上樂隨往事其父

甚謹一日賊酋遣人沉日成于水樂泣請曰我有祖母幸留

父侍養請以已代父死不聽樂抱父不忍捨遂同死焉元史周樂傳

傳

報仇

灌夫父灌孟吳楚反時潁陰侯灌何為將軍屬太尉請灌孟為

校尉夫以千人與父俱灌孟死吳軍中軍法父子俱從軍有

死事得與喪歸灌夫不肯隨喪歸奮曰願取吳王若將軍頭

以報父之讐於是灌夫被甲持戟募軍中壯士所善願從者

數十人及出壁門莫敢前獨二人及從奴十數騎馳入吳軍

至吳將麾下所殺傷數十人不得前復馳還走入漢壁皆亾

其奴獨與一騎歸夫身中大創十餘適有萬金良藥故得無

死夫創少瘳又復請將軍曰吾益知吳壁中曲折請復往將



軍壯義之恐亾夫乃言太尉太尉乃固止之吳已破灌夫以此名聞天下賴陰侯言之上上以夫爲中郎將

史記魏其武安傳

李廣爲前將軍從大將軍衛青擊匈奴旣出塞青捕虜知單于所居乃自以精兵走之而令廣并於右將軍軍出東道東道少回遠而大軍行水草少其勢不屯行廣自請願居前先死單于大將軍青亦陰受上誡以爲李廣老數奇母令當單于恐不得所欲廣固自辭於大將軍大將軍不聽廣意甚愠怒而就部引兵與右將軍合軍出東道軍亾導或失道後大將軍大將軍與單于接戰而還南絕幕遇前將軍右將軍大將軍軍使長史問失道狀欲上書報天子軍曲折急責廣之幕府

對簿廣遂引刀自剄廣子敢爲郎中令怨大將軍青之恨其父乃擊傷大將軍大將軍匿諱之居無何敢從上雍至甘泉宮獵驃騎將軍去病與青有親射殺敢去病時方貴幸上諱

云鹿觸殺之

史記李將軍傳

鍾離意遷堂邑令縣人防廣爲父報讐繫獄其母病死廣哭泣不食意憐傷之乃聽廣歸家使得殯斂丞掾皆爭意曰罪自我歸義不累下遂遣之廣斂母訖果還入獄意密以狀聞廣

竟得以減死論


後漢書鍾離意傳

吳祐遷膠東侯相安邱男子毋邱長與母俱行市道遇醉客辱其母長殺之而亾安邱追蹤於膠東得之祐呼長謂曰子母

見辱人情所恥然孝子忿必慮難動不累親今若背親逞怒  
白日殺人赦若非義刑若不忍將如之何長以械自繫曰國  
家制法囚身犯之明府雖加哀矜恩無所施祐問長有妻子  
乎對曰有妻未有子也即移安邱逮長妻到解其桎梏使同  
宿獄中妻遂懷孕至冬盡行刑長泣謂母曰負母應死當何  
以報吳君乎乃齧指而吞之含血言曰妻若生子名之吳生  
言我臨死吞指為誓屬兒以報吳君因投繯而死後漢書  
吳祐傳  
韓暨同縣豪右陳茂譖暨父兄幾致大辟暨陽不以為言庸貨  
積資陰結死士遂追呼尋禽茂以首祭父墓由是顯名魏志  
韓暨  
傳

刁協遷尚書令加金紫光祿大夫王敦構逆協為人所殺送首  
於敦協子彝王敦誅後彝斬讐人黨以首祭父墓詣廷尉請  
罪朝廷特宥之晉書刁  
協傳

王談年十歲父為隣人竇度所殺談陰有復讐志而懼為度所  
疑寸刃不畜日夜何度未得至年十八乃密市利錘陽若耕  
鉏者度常乘舡出入經一橋下談伺度行還伏草中度既過  
談於橋上以錘斬之應手而死既而歸罪有司太守孔巖義  
其孝勇列上宥之巖諸子為孫恩所害無嗣談乃移居會稽  
修理巖父子墳墓盡其心力後太守孔厥究其義行舉談為  
孝廉談不應召終于家晉書王  
談傳



喬智明為殄寇將軍隆慮共二縣令二縣愛之號為神君部人張兌為父報仇母老單身有妻無子智明愍之停其獄歲餘令兌將妻入獄兼陰縱之人有勸兌逃者兌曰有君如此吾何忍累之縱吾得免作何面目視息世間於獄產一男會赦得免其仁感如是

晉書喬智明傳

周文育為南道都督為王琳所執後逃歸授使持節散騎常侍鎮南將軍開府儀同三司熊曇朗害之文育子寶安年十餘歲便習騎射以貴公子驕蹇遊逸好狗馬樂馳騁靡衣媮食文育令監知郡事尤聚惡少年及文育繫於王琳寶安便折節讀書與士君子遊綏御文育士卒甚有威惠除貞威將軍

吳興太守文育為熊曇朗所害徵寶安為猛烈將軍領其舊兵平王琳有功周迪之破熊曇朗寶安南入窮其餘燼尋進

號仁威將軍

陳書周文育傳

淳于誕父興宗南安太守誕年十二隨父向揚州父於路為羣盜所害誕雖童稚而哀感奮發傾資結客旬朔之內遂得復讐由是州里歎異之

魏書淳于誕傳

柳慶為司會先是慶兄檜為魏興郡守為賊黃寶所害檜子三人皆幼弱慶撫養甚篤後寶率眾歸朝廷待以優禮居數年檜次子雄亮白日手刃寶於長安城中晉公護聞而大怒執慶及諸子姪皆囚之讓慶曰國家憲綱皆君等所為雖有

私怨寧得擅殺人也對曰慶聞父母之讐不同天昆弟之讐

不同國明公以孝治天下何乃責於此乎護愈怒慶辭色無

所屈卒以此免周書柳慶傳

錢仲期子延慶吳慶恩殺仲期延慶屬役在都聞父死馳還於

庾浦埭逢慶恩手刃殺之自繫烏程獄吳興太守郗顯表不

加罪許之南史孫棘傳

張景仁父梁天監初為同縣韋法所殺景仁時年八歲及長志

在復讐普通七年遇法於公田渚手斬其首以祭父墓事竟

詣郡自縛乞依刑法太守蔡天起上言於州時簡文在鎮乃

下教褒美之原其罪下屬長蠲其一戶租調以旌孝行南史張景

仁傳

李慶緒父為人所害慶緒九歲而孤為兄所養日夜號泣志在

復讐投州將陳顯達仍於部伍白日手刃其仇自縛歸罪州

將義而釋之南史李慶緒傳

孫益德母為人所害益德童幼為母復仇還家哭於殯以待縣

官孝文文明太后以其幼而孝決又不逃罪特免之北史孫益德傳

吳悉達兄弟三人年竝幼小父母為人所殺及長報仇避地永

安刺史以悉達兄弟行著鄉里板贈悉達父勃海太守悉達

後欲改葬亾失墳墓推尋弗獲號哭之聲晝夜不止叫訴神

祇忽於悉達足下地陷得父銘記因遷葬曾祖已下三世九

喪傾盡資業不假於人有司奏聞標閣復役以彰孝義

北史吳悉

達傳

周智壽其父被族人安吉所害智壽及弟智爽乃候安吉於途

擊殺之兄弟相率歸罪於縣爭為謀首官司經數年不能決

鄉人或證智爽先謀竟伏誅臨刑神色自若顧謂市人曰父

讐已報死亦何恨智壽頓絕衢路流血徧體又收智爽屍舐

取智爽血食之皆盡見者莫不傷焉

舊唐書王君操傳

程名振歸高祖詔授永寧令使率兵經略河北劉黑闥陷洛州

名振自拔歸母妻為賊所得名振率眾千餘掠冀貝滄瀛等

州邀擊糧道悉毀賊水陸餉具黑闥怒殺其母妻賊平請手

斬黑闥以其首祭母

新唐書程務挺傳

杜審言貶吉州司戶參軍司馬周季重司戶郭若訥構其罪繫

獄將殺之季重等酒酣審言子并年十三衷刃刺季重於坐

左右殺并季重將死曰審言有孝子吾不知若訥故誤我審

言免官還東都蘇頲傷并孝烈誌其墓劉允濟祭以文

新唐書杜

審言傳

張永德父穎安州防禦使永德周世宗以永德領義成軍節度

時永德父穎為隸人曹澄等所害因奔南唐會議南征永德

請行自効許之師至壽春劉仁瞻堅壁不下永德出兵大敗

之仁瞻僅以身免世宗親征至壽州城下仁瞻執澄等三人

檻送行在意求緩師詔賜永德俾其甘心

宋史張永德傳

張藏英唐末舉族為賊孫居道所害藏英年十七僅以身免後

逢居道於幽州市引佩刃刺之不死為吏所執節帥趙德鈞

壯之釋而不問以補牙職藏英後因居道避地關南乃求為

關南都巡檢使至則微服攜鐵櫪匿居道舍側伺其出擊之

仆於地齧其耳噉之遂禽歸設父母位陳酒餼縛居道於前

號泣鞭之齧其肉經三日刳其心以祭即詣官首服官為上

請而釋之燕薊間目為報讐張孝子

宋史張藏英傳

范廷召父鐸為里中惡少年所害廷召年十八手刃父讐剖取

其心以祭父墓

宋史范廷召傳

李璘晉開運末契丹犯邊有陳友者乘亂殺璘父及家屬三人

乾德初璘隸殿前散祇候友為軍小校相遇於京師寶積坊

北璘手刃殺友而不遁去自言復父讐案鞠得實太祖壯而

釋之

宋史李璘傳

甄婆兒母劉與同里人董知政忿競知政擊殺劉氏婆兒始十

歲妹方襁褓託隣人張氏乳養婆兒避仇徙居後數年稍長

大婆兒謂兄曰我母為人所殺妹流寄他姓大讐不報何用

生為時方寒食具酒殺詣母墳慟哭歸取條桑斧置袖中往

見知政知政方與小兒戲婆兒出其後以斧斫其腦殺之有

司以其事上請太宗嘉其能復母讐特貸焉

宋史李璘傳

劉斌父加友端拱中為從弟志元所殺斌兄弟皆幼隨母改適人母嘗戒之曰爾等長必復父仇景德中斌兄弟挾刃伺志元於道刺之不殊即詣吏自陳具獄上請詔志元黥面配隸

汝州釋斌等罪 宋史劉斌傳

趙炳加鎮國上將軍安西王相王薨被旨入見陳運使郭琮郎中郭叔雲不法改中奉大夫安西王相兼陝西五路西蜀四川課程屯田事偕勅使往按琮等至則琮假嗣王旨入炳罪炳子仁榮訴於上詔近侍脫炳械琮黨偕來琮等留使者醉以酒毒炳於獄琮等至帝親鞫問盡得其情既各伏辜命仁榮手刃琮叔雲於東城籍其家以付仁榮仁榮曰不共戴天

之人所蓄之物皆取於民何忍受之帝善之別賜鈔二萬二

千五百緡為治喪具 元史趙炳傳

陳祐遷浙東道宣慰使值盜遇害子夔芍陂屯田萬戶初在揚州聞祐遇盜死泣請于行省願復父讐擒其賊魁戮于紹興

市 元史陳祐傳

雪恨

刁協遷尚書令加金紫光祿大夫王敦構逆帝令協避禍行至江乘為人所殺送首於敦敦平後協以出奔不被顯贈咸康中協子彝上疏訟之丹陽尹殷融議左光祿大夫蔡謨與庾

冰書追贈本官 晉書刁協傳

宋繇世仕張氏父僚繇生而僚爲張邕所誅五歲喪母事伯母張氏以孝聞八歲而張氏卒居喪過禮喟然謂妹夫張彥曰門戶傾覆負荷在繇不銜膽自厲何以繼承先業遂隨彥至酒泉追師就學閉室讀書晝夜不倦博通經史後拜河西王右丞相錫爵清水公

北史宋繇傳

劉洎遷侍中兼左庶子檢校民部尚書褚遂良誣奏之太宗賜洎自盡則天臨朝其子宏業上言洎被遂良譖而死詔令復其官爵

舊唐書劉洎傳

韋挺授太常卿謫象州刺史卒子待價爲燕然道行軍大總管禦突厥還拜文昌右相同鳳閣鸞臺三品表請削官秩迴恩

贈父於是贈挺潤州刺史

舊唐書韋挺傳

劉晏爲尚書左僕射貶忠州刺史楊炎誣構其罪受誅天下寃之家屬徙嶺表貞元五年上悟方錄晏子執經授太常博士少子宗經祕書郎執經上請削官贈父特追贈鄭州刺史

舊唐書

書劉晏傳

李仕衡遷同州觀察使知陳州曹利用仕衡壻也利用被罪降仕衡左龍武軍大將軍分司西京歲餘改左衛大將軍卒其後諸子訴其父有勞於國非意左遷詔追復同州觀察使

宋史李仕衡傳

楊政崇寧三年夏人舉國大入父忠戰歿政應募累功至經略



安撫涇原兼帥環慶利路三鎮母留敵境間遣人省視之母  
惟勉以忠義紹興九年和議成始得迎母及兄弟歸乞祠以  
便養不許詔封其母感義郡夫人

宋史楊政傳

洪皓擢徽猷閣待制假禮部尚書為大金通問使龔璿副之命  
皓兼淮南京東等路撫諭使皓至雲中流遞冷山璿受劉豫  
官皓不屈皓自建炎己酉出使至還留北中凡十五年得還  
秦檜不憚除徽猷閣直學士提舉萬壽觀兼權直學士院尋  
責濠州團練副使安置英州復朝奉郎徙袁州卒皓子遵為  
御史免喪召對極陳父冤曰先臣與龔璿同出疆璿仕於劉  
豫以妄殺兵官為豫所誅而秦檜贈以節旄擢用其子先臣

拒金人之命留十五歲乃得歸顧南竄嶺外臣兄弟屏跡在

外檜不分忠逆如此

宋史洪皓傳

賈涉父偉嘗守開江貽書丞相趙雄極論武興守吳挺之橫它  
日陛對又乞裁抑郭棟郭杲兵權孝宗嘉納後反為所擠以  
沒涉弱冠直父冤不避寒暑泣愬十年至伏書闕下

宋史賈涉傳

安德裕父重榮晉成德軍節度德裕生於真定未朞重榮舉兵  
敗乳母抱逃水竇中將出為守兵所得執以見軍校秦習習  
與重榮有舊因匿之習先養石守瓊為子及年壯無嗣以德  
裕付瓊養之因姓秦氏習世兵家以弓矢狗馬為事德裕孩  
提即喜筆硯遇文字輒為誦讀聲諸子不之齒習獨異之既


成童俾就學遂博貫文史精於禮傳嗜西漢書習卒德裕行三年服然後還本姓習家盡以橐裝與之凡白金萬餘兩德裕却之曰斯秦氏之蓄於我何有丈夫當自樹功名以取富貴豈屑於他人所有耶聞者高之德裕擢進士甲科歷判太府寺宋史安德裕傳

鄭鼎授湖北道宣慰使戰樊口溺死贈宣忠保節功臣平章政事柱國追封潞國公謚忠肅子制宜以功授大都留守領少府監兼武衛親軍都指揮使知屯田事成宗素知其名眷遇殊厚每侍宴輒不敢飲終日無惰容帝察其忠勤屢賜內醞輒持以奉母帝聞之特封其母蘇氏為潞國太夫人元史鄭鼎傳

趙良弼父慤金威勝軍節度使謚忠閔慤長子良貴嵩汝招討使良貴子讜許州兵官慤從子良材守太原俱死事良弼至元七年奉使日本授秘書監奏臣父兄四人死事于金乞命翰林臣文其碑臣雖死絕域無憾矣帝從其請元史趙良弼傳

遺恨

張武父業郡門下掾送太守妻子還鄉里至河內亭盜夜劫之業與賊戰死遂亾失屍骸武時年幼不及識父後之太學受業每節常持父遺劔至亾處祭醮而還太守第五倫嘉其行舉孝廉遭母喪過毀傷父魂靈不返因哀慟絕命後漢書張武傳趙苞遷遼西太守到官明年遣使迎母及妻子垂當到郡道經



柳城值鮮卑萬餘人入塞寇鈔苞母及妻子遂為所劫質載以擊郡苞率步騎二萬與賊對陣賊出母以示苞苞悲號謂母曰為子無狀欲以微祿奉養朝夕不圖為母作禍昔為母子今為王臣義不得顧私恩毀忠節唯當萬死無以塞賊母遙謂曰威豪人各有命何得相顧以虧忠義昔王陵母對漢使伏劍以固其志爾其勉之苞即時進戰賊悉摧破其母妻皆為所害苞殞斂母畢自上歸葬靈帝遣策弔慰封郇侯苞葬訖謂鄉人曰食祿而避難非忠也殺母以全義非孝也如是有何面目立於天下遂歐血而死

後漢書趙苞傳

廖扶父為北地太守永初中坐羌沒郡下獄死扶感父以法喪

身憚為吏及服終而歎曰老子有言名與身孰親吾豈為名乎遂絕志世外專精經典尤明天文讖緯風角推步之術州郡公府辟召皆不應就問災異亦無所對常居先人家側未曾入城市太守謁煥先為諸生從扶學後臨郡未到先遣吏修門人之禮又欲擢扶子弟固不肯當時人因號為北郭先生

後漢書廖扶傳

李允祖敏漢河內太守去官還鄉里遼東太守公孫度欲彊用之敏乘輕舟浮滄海莫知所終允父信追求積年浮海出塞竟無所見欲行喪制服則疑父尚存情若居喪而不聘娶燕國徐邈以不孝莫大於無後勸使娶妻既生允遂絕房室恒

如居喪禮不堪其憂數年而卒 晉書李允傳

王哀父儀為文帝司馬東關之役帝問於眾曰近日之事誰任其咎儀對曰責在元帥帝怒曰司馬欲委罪於孤邪遂引出斬之哀痛父非命隱居教授三徵七辟皆不就廬于墓側且夕常至墓所拜跪母性畏雷母沒每雷輒到墓曰哀在此及讀詩至哀哀父母生我劬勞未嘗不三復流涕門人受業者竝廢蓼莪之篇及洛京傾覆寇盜蜂起親族悉欲移渡江東哀戀墳壟不去賊大盛方行猶思慕不能進遂為賊所害 晉書

王哀傳

羊希為寧朔將軍廣州刺史降號橫野將軍希以沛郡劉思道

行晉康太守思道率所領攻州城希踰城走思道獲而殺之希子崇尚書主客郎聞廣州亂即日便徒跣出新亭不能步涉頓伏江渚門義以小船致之於是進路父葬畢不勝哀卒 宋書羊元保傳

陸厥揚州別駕閑子也厥遷後軍行參軍永元元年始安王遙光反厥父閑被誅厥坐繫尚方尋有赦令厥恨父不及感慟而卒 南齊書陸厥傳

陸襄父閑齊始安王遙光揚州治中遙光據東府作亂臺軍攻陷城閑見執第二子絳求代死刑者俱害之襄痛父兄之酷喪過于禮服釋後猶若居憂高祖除為揚州治中襄父終此

官固辭職高祖不許聽與府司馬換解居之襄遷祕書監領揚州大中正遷度支尚書卒襄弱冠遭家禍終身蔬食布衣不聽音樂口不言殺害五十許年

梁書陸襄傳

張緬宏策子宏策任衛尉卿為妖賊所害緬痛父之酷喪過於禮高祖遣戒喻之

梁書張緬傳

沈瑀為尋陽太守信威蕭穎達長史瑀性崛彊每忤穎達穎達銜之瑀為盜所殺多以為穎達害焉子續累訟之遇穎達亦尋卒遂不窮竟續乃布衣蔬食終其身

梁書沈瑀傳

蕭摩訶授開府儀同三司從漢王諒詣并州同諒作逆伏誅摩訶子世廉性至孝及摩訶凶終服闋後追慕彌切其父時賓

故脫有所言及世廉對之哀慟不自勝言者為之歔歔終身不執刀斧時人嘉焉

陳書蕭摩訶傳

李昶父遊屬爾朱之亂奔江左昶為昌州刺史卒昶以父在江南身寓關右自少及終不飲酒聽樂時論以此稱焉

周書李昶傳

袁粲泰初七年為尚書令初粲忤於孝武其母侯乘輿出負塼叩頭流血塼碎傷目自此後粲與人語有誤道眇目者輒涕

泣彌日

南史袁湛傳

袁昂雍州刺史顓之子也顓敗昂會赦得出猶徙晉安在南唯勤學至元徽中聽還時年十五初顓敗傳首建鄴藏於武庫以漆題顓名以為誌至是始還之昂號慟嘔血絕而復蘇以

淚洗所題漆字皆滅人以為孝感葬訖更制服廬于墓次以

父亾不以理終身不聽音樂南史袁湛傳

張稷為青冀二州刺史州人徐道角等夜襲州城乃害之稷子

曠感家禍終身蔬食布衣手不執刀刃不聽音樂南史張裕傳

劉懷慰父乘人冀州刺史死於義嘉事懷慰持喪不食醯醬冬

日不用絮衣南史劉懷珍傳

孫法宗父隨孫恩入海溢被害屍骸不收母兄並餓死法宗年

小流逆至十六方得還單身勤苦霜行草宿營辦棺槨造立

冢墓葬送母兄儉而有禮以父屍不測入海尋求聞世間論

是至親以血瀝骨當悉漬浸乃操刀沿海見枯骸則刻肉灌

血如此十餘年臂脛無完皮血脈枯竭終不能逢遂衰經終

身常居墓所後忽苦頭創夜有女人至曰我是天使來相謝

行創本不關善人使者遠相及取牛糞煑傅之即驗一傳便

差一境賴之終身不娶饋遺無所受宋孝武初揚州辟為文

學從事不就南史孫法宗傳

華寶父豪晉義熙末戍長安年八歲臨別謂寶曰須我還當為

汝上頭長安陷寶年至七十不婚冠或問之寶輒號慟彌日

不忍荅也南史華寶傳

王文殊父沒魏文殊思慕泣血終身蔬食不衣帛服麻緼而已

不婚不交人物吳興太守謝瀟聘為功曹不就立小屋於縣

西端拱其中歲時伏臘月朝十五未嘗不北望長悲如此三十餘年太守孔琇之表其行鬱林詔榜門改所居爲孝行里

南史王文殊傳

庾沙彌父佩玉仕宋位長沙內史昇明中坐沈攸之事誅時沙彌始生及年五歲所生母爲製采衣輒不肯服母問其故流

涕對曰家門禍酷用是何爲及長終身布衣蔬食

南史庾道愨傳

傅弈拜太史丞會令庾儉以父質占候忤煬帝死懲其事恥以

術宦薦弈自代弈遷令與儉同列數排毀之儉不爲恨

新唐書傳

傅弈

李愷改光祿卿東京畱守安祿山反愷繕城壘綏勵士卒將過

賊西鋒帝聞擢禮部尙書祿山度河執愷害之子源八歲家覆俘爲奴轉側民間及史朝義敗故吏識源於洛陽者贖出之歸其宗屬代宗聞授河南府參軍遷司農主簿以父死賊手常悲憤不仕不娶絕酒葷惠林佛祠者愷舊墅也源依祠居闔戶日一食祠殿其先寢也每過必趨未始踐階自營墓爲終制時時偃臥堦中長慶初年八十矣御史中丞李德裕表薦源詔以源守諫議大夫賜緋魚袋河南尹遣官敦諭上道帝自遣使者持詔書袍笏卽賜又賜絹二百匹源頓首受詔謂使者伏疾年耄不堪趨拜卽附表謝辭吐哀慙一無受

新唐書李愷傳

張昭祖楚平壽張令楚平生直卽昭父也初楚平赴調長安值  
巢寇亂不知所終直幼避地河朔旣冠以父失所在時盜賊  
蠶起道路榛梗乃自秦抵蜀徒行丐食求父所在積十年不  
能得乃發哀行服躬耕海濱青州王師範招直署賓職直北  
歸教授時號逍遙先生昭爲翰林學士直以昭故授著作佐  
郎致仕卒

宋史張昭傳

姚兕父寶戰死定川兕戰功拜通州團練使卒於鄜延總管兕  
幼失父事母孝凡圖畫器用皆刻仇讎未報字

宋史姚兕傳

姚栖雲唐貞元中調卒戍邊栖雲之父語其兄曰兄嗣未立可  
無往某幸有子請代兄行遂戰沒塞上時栖雲方三歲其母

再嫁栖雲養於伯母旣長事伯母如其母伯母亾栖雲葬之  
又招魂葬其父痛其父死於邊乃廬於墓次終身哀慕不衰  
縣令蘇轍以俸錢買地開阡刻石表之河中尹渾瑊上其事  
詔加優賜表其門名其鄉曰孝悌社曰節義里曰敬愛

宋史姚宗

明傳

王樵博通羣書不治章句尤善考易與賈同李冠齊名學者多  
從之咸平中契丹遊騎度河舉家被掠樵卽棄妻挺身入契  
丹訪父母累年不獲還東山刻木招魂以葬立祠畫像事之  
如生服喪六年哀動行路又爲屬之尊者次第成服北望嘆  
曰身世如此自比於人可乎遂與俗絕自稱贅世翁唯以論



兵擊劔為事一驢負裝徒步千里晚年屢遊塞下畫策于何承矩耿望求滅遼復讎不用乃於城東南隅累磚自環謂之繭室銘其門曰天生王樵薄命寡智材不濟時道號贅世生而為室以備不虞死則藏形不虞乃備病革入室自掩戶卒治平末職方郎中向宗道知淄州訪繭室已構屋為民居得樵甥牟氏子乃知改葬因而即其地復作繭室及祠堂刻石

以記之

宋史王樵傳

韓玉授同知陝西東路轉運使事都城受圍夏人陷邠涇陝西安撫司檄玉以鳳翔總管判官為都統府募軍與夏人戰敗之夏人解去當路者忌其功驛奏玉與夏寇有謀朝廷疑之

使使者授玉河平軍節度副使且覘其軍先是華州李公直以都城隔絕謀舉兵入援而玉恃其軍為可用亦欲為勤王之舉乃傳檄州郡京兆統軍便謂公直據華州反遣都統楊珪襲取之遂寘極刑公直曾為書約玉玉不預知其書乃為安撫所得及使者覘玉軍且疑預公直之謀即實其罪玉道出華州被囚死於郡學臨終書二詩壁間士論冤之子不疑以父死非罪誓不祿仕藏其父臨終時手書云此去冥路吾心皓然剛直之氣必不下沉兒可無慮世亂時艱努力自護幽明雖異寧不見爾讀者惻然

金史韓玉傳

家難

何求父鑠素有風疾無故害求母王氏坐法死求兄弟以此無  
宦情南史何尚之傳

何求弟黠居父母憂幾至滅性及長感家禍欲絕昏宦尚之強  
爲娶琅邪王氏禮畢將親迎黠累涕泣求執本志遂得罷老  
又娶魯國孔嗣女黠雖昏亦不與妻相見築別室以處之人  
莫諭其意南史何尚之傳

陶宏景父貞孝昌令爲妾所害宏景終身不娶南史陶宏景傳  
長孫慮母因飲酒其父真呵叱之誤以杖擊便卽致死真爲縣  
囚執處以重坐慮列辭尚書云父母忿爭本無餘惡直以謬  
誤一朝橫禍今母喪未殯父命旦夕慮兄弟五人竝沖幼慮

身居長今年十五有一女弟向始四歲更相鞠養不能保全  
父若就刑交墜溝壑乞以身代老父命使嬰弱衆孤得蒙存  
立尚書奏云慮於父爲孝子於弟爲仁兄尋情究狀特可矜  
感孝文帝詔特恕其父死罪以從遠流北史長孫慮傳

王方翼祖裕隋州刺史尚同安大長公主官開府儀同三司方  
翼早孤哀毀如成人時號孝童母李爲主所斥居鳳泉墅方  
翼尚幼雜庸保執苦不棄日墾田植樹治林垠墜完牆屋燎  
松丸墨爲富家主薨還京師居母喪哀瘠甚方翼以功遷夏  
州都督封太原郡公新唐書王方翼傳

張永德父穎安州防禦使永德生四歲母馬氏被出育於祖母

事繼母劉氏以孝聞永德出母後適安邑劉祚永德鎮南陽祚卒迎母歸州廨起二堂與繼母劉並居劉卒馬預中參時年八十一太宗勞之賜冠帔封莒國太夫人同母弟劉再思署子城使於市西里起大第聚劉族

宋史張永德傳

呂蒙正父龜圖起居郎蒙正太平興國二年擢進士第一五年拜左補闕知制誥初龜圖多內寵與妻劉氏不睦并蒙正出之頗淪躓窘乏劉誓不復嫁及蒙正登仕迎二親同堂異室

奉養備至

宋史呂蒙正傳

安守忠父審琦領山南東道守忠拜感德軍節度觀察留後徙宋州兼制置營田使初審琦以愛妾故為隸人所戕守忠終

身不畜妓妾而喜佞佛蓋有所懲云

宋史安守忠傳

郭密幼孤隨母適同郡王乙因冒姓王氏以知瀛州馬仁瑀薦

隸晉王帳下給事左右太宗即位補指揮使復姓郭氏

宋史郭密傳

李諮幼有至性父文捷出其母諮日夜號泣食飲不入口父憐之而還其母遂以孝聞舉進士真宗顧左右曰是能安其親

者擢第三人

宋史李諮傳

郭稹擢龍圖閣直學士權知開封府初稹幼孤母邊更嫁王氏既而母亾稹解官服喪知禮院宋郊言稹服喪為過禮詔下

有司博議用馮元等奏聽解官申心喪

宋史郭稹傳

賈黯為翰林侍讀學士知陳州初黯母陳歸宗繼母史在堂後

迎陳歸二母不相善黯能安以事之 宋史賈黯傳

劉湜舉進士為龍圖閣直學士知慶州湜少賤母更嫁營卒既

登第具袍笏趨卒舍迎母里人觀歎 宋史劉湜傳

范仲淹唐宰相履冰之後仲淹二歲而孤母更適長山朱氏從

其姓名說少有志操既長知其世家迺感泣辭母去之應天

府依戚同文學晝夜不息冬月憊甚以水沃面食不給至以

糜粥繼之人不能堪仲淹不苦也舉進士第為廣德軍司理

參軍迎其母歸養改集慶軍節度推官始還姓更其名母喪

仲淹遷戶部侍郎知青州仲淹以母在時方貧其後雖貴非

賓客不重肉妻子衣食僅能自充 宋史范仲淹傳

朱壽昌父與壽昌知廣德軍壽昌母劉氏與妾也與守京兆劉

氏方娠而出壽昌生數歲始歸父家母子不相聞五十年行

四方求之不置飲食罕御酒肉言輒流涕用浮屠法灼背燒

頂刺血書佛經力所可致無不為者熙寧初與家人辭訣棄

官入秦曰不見母吾不反矣遂得之於同州劉時年七十餘

矣嫁党氏有數子悉迎以歸京兆錢明逸以其事聞詔還就

官由是以孝聞天下自王安石蘇頌蘇軾以下士大夫爭為

詩美之壽昌以養母故求通判河中府數歲母卒壽昌居喪

幾喪明既葬有白鳥集墓上拊同母弟妹益篤 宋史朱壽昌傳

錢乙父穎喜游一旦東之海上不返乙方三歲母前死姑嫁呂氏哀而收養之長告以家世卽泣請往迹尋凡八九反積數歲遂迎父以歸時已三十年矣鄉人感慨賦詩咏之宋史錢乙傳

耶律烏不呂爲東路統軍都監太后加金紫崇祿大夫檢校太尉而弟國畱以罪亾烏不呂及其母俱下吏恐禍及母陰使人召國畱給曰太后知事之誣汝第來勿畏國畱至送有司

坐誅遼史耶律學古傳

耶律海里察割之亂其母的魯與焉遣人召海里海里拒之亂平的魯以子故獲免遼史耶律海里傳

聶炳授承事郎同知平昌州事炳蚤孤其母改適自平昌還始

知之卽迎其母以歸元史聶炳傳

李鵬飛池州人生母姚氏爲嫡母不容改嫁爲朱氏妻鵬飛幼


不知也年十九思慕哀痛誓學鑿以濟人願早見母行求三

歲至蘄州羅田縣得焉時朱氏家方疫鵬飛起之遂迎還奉

養久之復歸朱氏時渡江省覲旣卒歲時攜子孫往祭墓終

其身元史羊仁傳

高必達建昌人五歲時父明大忽棄家遠遊莫知所適必達旣長晝夜哀慕乃娶妻以養母而歷往四方求其父十餘年不得見心愈悲忽相傳黃州全真道院中有虛明子者學道三十年矣本姓高氏建昌人也匿姓名爲道人云必達詢問知



為父即往拜之具言家世及已之所生歲月大父母之喪葬始末因哀號叩頭不已虛明猶瞑坐不顧久之斥曰我非汝父不去何為必達留侍左右不少懈辭氣哀惻可矜其徒謂虛明日師有子如此忍弗歸乎虛明不得已乃還家必達孝養篤至鄉里稱之

元史高必達傳

黃道賢適母唐無子道賢在襁褓而生母蘇以疾去既長思念生母屢請於父得召之歸道賢竭力養二母得其歡心

元史黃道賢傳

廿二史言行略

廿二史言行略卷九終

文化甲子

